

Tusagassiutitut nalunaarut

Kalaalimernit mingutsitsinerlu oqallisigineqartut

Kalaalimernit avatangiisinillu mingutsitsinerup qanittukkut isumasioqatigiissutigineqarneranni angusat tunuliaqutaralugit Nerisaqarnermut siunnersuisoqatigiit inassuteqaatinik arlalinnik Peqqissutsimut Naalakkersuisumut tunniussa qarput

Nerisaqarnermut siunnersuisoqatigiit aamma Danmarks Miljøundersøgelser suleqatigiinnerisigut isumasioqatigiissitsinermi siunertaasimavoq ilisimatusarnermi angusat aammalu kalaalimernit mingutsitaanerisa innuttaasunut sunik kinguneqartarnerannik ilisimasalik tunniusseqatigiinnissaq. Aammattaaq siunertaasimavoq mingutsitsinerup ajornartorsiutaanerata ilisimatitsissutigineqartarnissaani iliuusissanut siunnersuutitnik pissarsserusunneq.

Isumasioqatigiinnermi peqataasut 40-t tassaasimapput politikerit, atuisut, atorfillit, suliamut tunngassutilinnik ilisimasallit ilisimatusartullu. Taakku ilaatigut kaammattuutigaat peqqinnissaqarfimmi sulisut nerisassalik mingutsitsisut pillugit innuttaasunik ataasiakkaanik siunnersuisarnissaminut pitsaannerusumik ilitsersorneqarnissaat. Aammattaaq siunnersuutigineqarpoq nerisassanut mingutsinneqarsimanerpaanut, soorlu aalisakkanut nunatsinneersunut taarsiullugit pisiarineqarsinnaasunik niuertarfiit allanik pisiassaateqarnissaat, aammalu nioqqutissat suut peqqinnartuunersut suullu peqqinnangitsuunersut pillugit niuertut annertunerusumik ilisimasaqartariaqartut, assersuutigalugu siullermeerluni umiarsuaqarnerani nioqqutissat peqqinnartut salliutillugit tikisittarnerisigut.

Peqataasut aammattaaq isumaqarput mingutsitsinerup ajornartorsiutaanerata ilisimatitsissutigineqarnera annilaangasaarutaasariaqanngitsoq, aammalu peqqissutsikkut ajornartorsiutitut annertunerusunut, assersuutigalugu imigassamut, tupamut sukkornermullu sanilliullugit isigineqassasut.

Nerisaqarnermut siunnersuisoqatigiit siulittaasuat Gert Mulvad ima oqaaseqarpoq:
"Mingutsitsinerup ajornartorsiutaanera imaannaanngitsuuvoq, innuttaasunullu tamarmiusunut assigiissumik oqimaaqatigiissumillu siunnersuinissaq ajornakusoorpoq. Taamaattumik paasissutissiisarnerup innuttaasunut ataasiakkaanut tunaartaqarnerunissaanik kissaateqarneq isumasioqatigiinnermi ersersinneqartoq siunnersuutaavoq qujarunnartoq, sulinitinni

ingerlateqqikkusutarput, iluassaqaarlu peqqinnissaqarfik Peqqissaanermillu Ilinniarfik
suleqatigisinnaagaanni".

*Paasissutissat sukumiinerusut uannga pissarsiarineqarsinnaapput: Gert Mulvad, 34 44 81
imaluunniit mobil: 48 32 53*

Yderligere oplysninger fås hos: Gert Mulvad, 34 44 81 eller mobil: 48 32 53